



**ХАРИЛЦАА ХОЛБООНЫ
ЗОХИЦУУЛАХ
ХОРОО**



**ХҮҮХДИЙГ ЗОХИСГҮЙ
АГУУЛГААС ХАМГААЛАХ
ЗӨВЛӨЛ**

**Хүүхдийг зохисгүй агуулгаас хамгаалах радио, телевизийн хөтөлбөрийн
дүрмийн хэрэгжилтэд хяналт тавих орон тооны бус зөвлөлийн
2025 оны 3-р улирлын ээлжит хуралдаан боллоо**

2025.09.26

Харилцаа холбооны зохицуулах хорооны дэргэдэх Хүүхдийг зохисгүй агуулгаас хамгаалах радио, телевизийн хөтөлбөрийн дүрмийн хэрэгжилтэд хяналт тавих Орон тооны бус зөвлөлийн 2025 оны гуравдугаар улирлын ээлжит хурлыг 09 дүгээр сарын 26-ны өдөр зохион байгууллаа.

Тус зөвлөл нь Өргөн нэвтрүүлгийн тухай хуулийн 30 дугаар зүйлийн 30.1.7 (а) дахь хэсэгт заасан Зохицуулах хорооны чиг үүргийн хүрээнд улирал тутам хуралдаж, хүүхдэд зохисгүй агуулга бүхий нэвтрүүлэг, мөн 18+ насны ангилалтай кино, бүтээлийг цагийн хязгаарлалт зөрчиж нэвтрүүлсэн зөрчлийн талаарх гомдол, хяналт-мониторингийн дүнг хэлэлцдэг.

Радио, телевизийн хөтөлбөрийн дүрэм зөрчсөн зохисгүй агуулга бүхий кино, нэвтрүүлэг гарсан талаарх гомдол ирсэн болон 18+ насны ангилалтай киног цагийн хязгаарлалт зөрчиж нэвтрүүлсэн телевизүүдэд Зөвлөлийн шийдвэрийн дагуу зөвлөмж, мэдэгдэл хүргүүлж, зөрчлийг арилгуулах арга хэмжээ авч, үр дүнг олон нийтэд тогтмол мэдээлж байна.

2025 оны 3-р улиралд Хүүхдийг зохисгүй агуулгаас хамгаалах Радио, телевизийн хөтөлбөрийн дүрэм зөрчсөн зохисгүй агуулгатай холбоотой гомдол ирээгүй болно.

Зөвлөлийн хуралдааны эхэнд радио, телевизийн хөтөлбөрт хүүхэд хамгаалах асуудлыг чиг үүргийнхээ хүрээнд хэлэлцэж, гишүүдийн байр суурийг сонслоо.

Мөн энэ удаагийн хурлаар Кино урлагийн зөвлөлийн Ажлын албаны даргын 2025 оны 3 дугаар сарын 17-ны өдрийн А/10 тоот тушаалаар байгуулагдсан, “Кино урлагийг дэмжих тухай” хуульд заасан “Насны ангилал тогтоох шалгуур, кино түгээхэд баримтлах журам”-ын төслийн талаар санал авах уулзалтыг ажлын хэсгийн гишүүдтэй зохион байгуулав.

Уулзалтаар ажлын хэсгийн гишүүдийн боловсруулсан төсөл болон холбогдох саналуудыг танилцуулж, хэлэлцээд эдгээрийг нэгтгэн журмын төсөлд тусгуулахаар Кино урлагийн зөвлөлийн дээрх ажлын хэсэгт хүргүүлэхээр боллоо.

Мөн зөвлөлийн гишүүд журам боловсруулахдаа холбогдох хууль тогтоомжтой уялдаа холбоог хангаж, шаардлагатай асуудлыг тусган боловсруулахыг зөвлөв.

Орон тооны бус Зөвлөлийн хуралдаанаар хэлэлцсэн асуудлууд:

1. Хүүхдийг зохисгүй агуулгаас хамгаалах, радио, телевизийн хөтөлбөрийн дүрмийн хэрэгжилтийг хангах чиглэлээр Орон тооны бус зөвлөл болон Өргөн нэвтрүүлгийн зохицуулалтын газраас 2025 онд хэрэгжүүлсэн ажил- өргөн нэвтрүүлэгт хүүхдийг зохисгүй агуулгаас хамгаалах чиглэлээр олон нийтийг соён гэгээрүүлэх ажлын тайлан, танилцуулга.
2. 2025 оны эхний гурван улиралд телевизүүдийн хөтөлбөрийн хяналт, мониторингийн дүнгээс 18+ тэмдэглэгээтэй кино, нэвтрүүлгийг цагийн хязгаарлалт зөрчиж нэвтрүүлсэн тоо өмнөх улирлаас буурсан эсэх тайлан болон 2025 оны 6–8 дугаар сарын мониторингийн дүнгийн танилцуулга;
3. Орон тооны бус зөвлөлийн 2025 оны 1-2 дугаар улирлын хурлаас гарсан зөвлөмж, мэдэгдлийн хэрэгжилтийн явц.
 - 18+ тэмдэглэгээтэй кино, нэвтрүүлгийн цагийн хязгаарлалтын зөрчлийг арилгасан эсэх
 - Радио, телевизийн хөтөлбөрийн дүрэм зөрчиж зохисгүй агуулга нэвтрүүлсэн эсэх, эдгээр зөрчил давтагдсан эсэх

Мониторингийн үр дүнд илэрсэн нийтлэг зөрчлүүд

1. Өдрийн болон оройн цагт 18+ ангилалтай контент нэвтрүүлэх

- 06:00–22:00 цагийн хооронд 18+ тэмдэглэгээтэй кино, нэвтрүүлэг нэвтрүүлсэн гурван телевиз (25-р суваг, Хөгжил ТВ, ТВ9) бүртгэгдэв.
- Ихэнх тохиолдолд насны ангиллыг буруу тогтоож тавьсан
- 22 цагаас хойш нэвтрүүлсэн 18+ тэмдэглэгээтэй контентыг маргааш нь өдөр, оройн цагаар давтан нэвтрүүлсэн зөрчил түгээмэл илэрсэн.
- Стандартад нийцээгүй насны ангиллын тэмдэглэгээ ашигласан зөрчил
 - Кино нэвтрүүлэхдээ насны ангиллын тэмдэглэгээг MNS 6587:2020 стандартын дагуу тавиагүй, эсхүл тэмдэглэгээ огт тавиагүй – 2 телевиз Дорнод ТВ6, ХТВ бүртгэгдсэн.
 - Зарим гаднын бүтээлд MNS 6587:2020 стандартад заасан 3+, 6+, 12+, 18+ ангиллын оронд 15+, 21+ гэх мэт стандартад заагаагүй ангилал ашигласан зөрчил түгээмэл байна.
- 18+ тэмдэглэгээтэй зохисгүй агуулгатай контент нэвтрүүлсэн

Хүүхдийг зохисгүй агуулгаас хамгаалах радио, телевизийн хөтөлбөрийн дүрмээр хязгаарласан

- бэлгийн амьдралыг дэлгэрэнгүй харуулсан,
- мансууруулах эм, сэтгэцэд нөлөөт бодис мансууруулах ургамал хэрэглэж байгааг дүрсэлсэн контентыг 5 телевиз өдрийн цагаар нэвтрүүлсэн зөрчил бүртгэгдсэн байна.

Эдгээр зохисгүй агуулгатай контентыг Зөвлөлийн хуралдаанаар хэлэлцээд,

Хүүхдийг зохисгүй агуулгаас хамгаалах радио, телевизийн хөтөлбөрийн дүрмийн 2.4.5 дахь хэсэг, 2.8 дахь хэсгийн шаардлагыг зөрчсөн гэж үзлээ.

Зөвлөлөөр хэлэлцээд авсан арга хэмжээ

- Радио, телевизийн хөтөлбөрийн дүрмээр хязгаарласан зохисгүй агуулга бүхий киног өдрийн цагаар нэвтрүүлж, зохисгүй агуулгыг хаах, хязгаарлах арга хэмжээ аваагүй ТВ5, Айст Глобал, DBS, Дорнод ТВ6, X TV телевизүүдэд зөрчлийн талаар мэдэгдэл хүргүүлэх, мөн өмнө нь зөрчил гаргаж байгаагүйг харгалзан, Өргөн нэвтрүүлгийн зохицуулалтын газраас дахин зөрчил давтагдвал Өргөн нэвтрүүлгийн тухай хууль, Хүүхэд хамгааллын тухай хууль зөрчсөнд тооцох үндэслэл болох тул Зөрчлийн хуулийн дагуу хариуцлага хүлээлгэхээр Зөрчил шалган шийдвэрлэх харьяаллын дагуу шилжүүлэхийг анхааруулав;
- Харин зөрчлөө удаа дараа давтан гаргасан бөгөөд өмнө нь Зөвлөлөөс зөвлөмж, мэдэгдэл хүргүүлж байсан 25-р суваг телевизийн зөрчлийн асуудлыг зөвлөлөөр хэлэлцлээ. Зөвлөлийн гишүүд Хүүхэд хамгааллын тухай хууль, Өргөн нэвтрүүлгийн тухай хууль зөрчсөнд тооцож, Зөрчлийн тухай хуулийн 6.20.10-т заасны дагуу өөрийн үйлчилгээнд хүүхдэд хортой агуулгыг хянах, хязгаарлах, хаах арга хэмжээ авах үүргээ биелүүлээгүй үндэслэлээр цаашид Зөрчлийн тухай хуулийн дагуу хариуцлага тооцуулах боломжтойг анхааруулав.

Тухайн телевизийн 22:00 цагаас өмнө нэвтрүүлсэн 18 + ангиллын кинонд Хүүхдийн хөтөлбөрийн дүрмээр хязгаарласан зохисгүй агуулга бүртгэгдээгүй, гомдол ирээгүй тул энэ удаад зөвхөн хууль, дүрмийн хэрэгжилтийг чанд мөрдөхийг сануулах, мөн сануулах албан бичигт зөрчил давтагдвал Зөрчил шалган шийдвэрлэх харьяаллын дагуу холбогдох байгууллагад шилжүүлэхийг анхааруулах нь зүйтэй гэж үзэв.

Иймд Зөвлөлийн гишүүд дээрх телевизүүдийг зөрчлийг давтан гаргахгүй байхыг анхааруулж, цаашид зөрчил давтагдвал холбогдох хууль тогтоомжийг зөрчсөн үндэслэлээр Зөрчлийн тухай хуулийн 6.20.10-т заасны дагуу хүүхдэд хортой агуулгыг хянах, хязгаарлах, хаах арга хэмжээ авах үүргээ биелүүлээгүй, мөн 9.13 дугаар зүйлийн 2-т заасны дагуу 18 + ангиллын киног цагийн хязгаарлалт зөрчиж нэвтрүүлсэн зөрчлийг Зөрчил шалган шийдвэрлэх харьяаллын дагуу холбогдох байгууллагад шилжүүлэх нь зүйтэй гэсэн санал гарлаа.

ӨРГӨН НЭВТРҮҮЛГИЙН ЗОХИЦУУЛАЛТЫН ГАЗАР